

四庫全書

集部

欽定四庫全書

集部

見素續集卷六

四至六

詳校官中書臣 賈 錄

中書臣 劉源溥覆勘

覆校官中書臣 汪學金

校對官助教臣 蔡 鎮

謄錄監生臣 王秉鈞

欽定四庫全書

見素續集卷四

明 林俊 撰

七言律

留別諸老

遂歸成喜亦成悲貯結真同在位時白壑青邱憐獨往  
碧霄涼月夢常疑趨陪定記心中話契闊聊哦醉裏詩  
萬國嵩呼齊王帛兩班簉迹重臯獎

鶴袍元不戀漁蓑精力曾如老去何混迹巢由皆自許  
諸公堯舜望應多直從聖學開天縱薄與斯民乞歲和  
海上山靈驚往別閒身還屬素雲窩

留別內閣四老

曉鐘涼月動冠紳仗外仙班拱帝宸九服輿圖商令主  
四朝軍國宋師臣壯猷紫殿傳宣亟舊學黃扉顧問頻  
老愛太平還物象許從雲水乞閒身

手完大物謝無功開德宣符志慮同鄂郢孕和深王氣

雲雷成象苦良工 中興帝業風斯下  
通道王臣水盡東 一體天休平格在末由

心迹寄冥鴻

留別少司寇顧梅田翁并諸賢

暮年此出重何功 相悉寅僚意許同  
默有生全培帝德 薄存仁厚贊周風  
麗天星斗心懸北 決月官河路轉東  
沒首平反餘繫念 不禁衰颯對秋蓬

待罪公曹夢許驚 率先時共贊無刑繩  
違如例施操縱衝 決何情易重輕三典  
敢忘天地德一心 真欲鬼神盟

爽鳩千古憑誰嗣直到蘇公始姓名

留別鄉諸賢

帝城南去是歸裝翹首雲天思轉長吏冗少神隨事忘  
病魔催老到家忙人心未必能三代道化先須盡一鄉  
麥飯魚羹酬舊隱水煙山月夢溪堂

襪材終短重何裨衰颯偏於老作期霖雨已孤憂旱望  
鄉雲空見出山時天南候鴈隨將去客裏周星感又移  
話別來賢心更切棘林鳩夢未安枝

秋卿外直別話

解衣盤礴試新醪  
過鳥秋清下羽毛  
已愛道人論心曲  
不知僧舍是公曹  
暮年去住情難割  
後夜交遊夢轉勞  
月色江聲寥寂外  
坐深槐露濕征袍

贈江藩伯景熙同年宮保東川公子

文物東藩喜近臨  
故人為別意還深  
名家型範平看副  
裕國源流信許尋  
安得三錢長米價  
祇知一粒自民心  
常平舊格今誰問  
老愛雲莊是好音

次白巖燕泉贈篇

南歸應得共秋鴻小借江帆兩月風收到粉榆還暮景  
抱回畎畝是餘忠大家未信藩籬隔少室真憐臭味同  
舊話老農深席力閒身雲白雨青中

分淺遭逢已後時餘年空與病相隨地天共喜雲龍會  
邱壑真憐野鶴姿起贊中興曾樂策遂歸長別可無詩  
舊行假跡嵩呼下縈結心多是此辭

次吳白樓卷中韻

文會雞鳴記。往年秋山回首，四朝前典刑數老。今誰在  
風雨重陽句，尚傳禮祀放晴中。夜月齊壇分碧壯，陵烟  
直廬奎聚翻成感，舊臆新悰一闇然。

東郭草堂詰別次白巖。南塢燕泉惕，菴聯句韻。  
文華飲德共依光，野覓山薇自別腸。擊轂大疏勞出祖，  
纓桐中散望升堂。例隨芝製修初服，春與花枝漏一陽。  
皓首薪歌無患福，夜闌清夢屢江鄉。

內廷辭叩重加難，忍盡柔腸泪暗乾。立近御爐香細細，

歸隨輦路珮珊瑚年踰祇覺行艱蹇才小難禁事錯盤  
祖席載移公不淺山容野色助悲歡

山衣野屐四朝臣老竊班行荷縉紳午谷逃虛東海上  
卯橋訪舊大江濱歲深老樹垂斑瘦風細平湖積素鱗  
歸去吏書無却事偃松高桂識吾真

首白交遊重數公祖筵別後復移東出門少海天容淡  
分袂西山夕照紅老去肝腸餘繫戀邇之精力失豪雄  
草堂不為疑猿鴉上德朋情積疊中

寓直話別次白巖南塢燕泉聯句韻

匏繫何情出屢希  
調孤俗尚故應違  
閱來滄海應三變  
數盡長鴻是四歸  
草野生成天地德  
玉關離合鬼神幾  
雙溪雲水經年別  
細葦新蒲暗舊磯

決日追陪不憚勞  
放懷時為禿霜毫  
文昌夜燭三台上  
風望晴看兩嶽高  
已辨壯猷當世責  
未酬繪句入詩豪  
秋殘斷飲渾無味  
空有黃花對蠟螯

聞自齊至楚早荒用韻志感

轉移無力愧愚公杼軸何情見兩東竟歲山農空事育  
太倉官粟幾陳紅抱愁不問身眠虎赴急真思力當熊  
大統入承瞻聖制在天七廟慰臨中

白浦悼章

元氣栽培語不虛二童一馬化行餘邇之靜海忽凶報  
昨者天津是薦書李郭交遊傾蓋晚彭殤修短賦形初  
倔強造物相降會長訣心多尚屬余

燭前老泪落班班太息吾流竟此還正氣直拋存歿外

要官時置有無間輯來諫草堪垂世堆到遺書莫買山  
寄取諸孤勤護植德門天道是循環

約九日飲邃翁信宿方到紀懷

菊花端為主人開悔後重陽一日來依舊兩山同對酒  
及衰雙腳強登臺天空鴈影將雲過風巫江潮帶海回  
莫謾交遊論老別物情銷盡樂寒灰

贈王履約履吉二生

水月相忘坐此清縕衣空竊好賢名吳中詞伯還雙陸

洛下儒宗亦二程  
幾信宮牆無路入  
極知水火有人爭  
傳心好亦當年事  
三絕韋編付短檠

悼樊清簡公

水水山山道路長  
故遊一瓣僅誰香  
食腸皓首平生孽  
墮骨青岡舊咏棠  
宿草西風懸老泪  
華星東閣繫幽光  
却憐石馬經行外  
閱盡人間有許忙

臨濟雨至衢尚未晴感事

村舍飄來僅幾椽  
竈沈何處復青烟  
雨餘藥裹兒曹累

晝寂官齋老思懸一霽過關宜有數四窮倚命恐無年  
變調陽德方亨會人事天心一慘然

偕祝遙緒訪武夷述懷

石林破影上漁磯九曲聯舟訪翠微白鶴不隨仙子去  
青峰偏約主人歸剥來田蔗供新筍收得溪藤補綻衣  
大隱山前繫長戀紫檀香火護巖扉

綸竿何物此危磯作者當年意亦微起落世闊閒較量  
行藏吾道信依歸學工幾試屠龍技性懶真酬卧犢衣

老向仙靈話情曲碧霄清夢尚黃扉

楊大正陶園用天遊韻

眼於山立寄峩峩少壯年華鳥一過再世兒孫盛梧竹  
小山猿鴉共松蘿泉分藥圃頻催灌酒熟林翁不廢哦  
却向柴桑話疇昔通時花似晉時多

碧雲為幙草為裯謀老應還自在身畎畝不忘心內事  
神仙元是世間人攢眉社約雲猶懶捧腹農談日許親  
最喜和陶無却事床移天外晚山頻

驥隙光陰祇自勞貂裘曾改木綿袍癖深泉石百方少  
懶過山林一著高異景每憑天作幄激流偏與石爭篙  
亦知桑棗成陰地別有人間不姓陶

舟至建溪諸公走介候迎附答

日華野色動歸旌江上仙風有使迎白葛載成方外製  
素琴先寄曲中聲縱懷文字飲三日寓目家山路四程  
老得謝還明王賜跡孤元不為媒名

四休述懷

老去官書可自由百年吾道信滄洲本無異術勞三往  
竊有閒名辦四休紅雨滿江楓葉暮青霜孤徑菊花秋  
抄來種樹堪長日靈草從多莫漫求

野坐山行適性真古松晴雨帶丰神雲雷本出經綸地  
烟水重酬縱浪身夢熟茶聲風細細調傳琴意水鱗鱗  
載回白鶲非忘世引領長天十二辰

鰲峯閨佳處近輔益之境益奇賦此

荒荒人世一微塵四極坤元老化身混沌當年良未死

參寥從此重翻新雲天漏下日三足雪浪吹來海萬鱗  
莫漫仙流訪蓬島紀綱物象鎮全閩

壽彭幸菴孫九峯

詢謀黃髮詔應同公自西來我自東一代才猷幾司馬  
兩人心迹舊冥鴻頭顱未負移山力精血憑酬補石功  
最有居閒圖報地挽回約質贊堯風

乞山積疊荷溫存青社閒行亦主恩日繞蘭陂騰海蜃  
雪消葱嶺夢河源辛盤細割犧心膾乳釀時傾瓊木尊

聞說官高還負責老於獨樂未開園

梅與茶並開

小堂歲裏賀春來  
茶花梅花相應開  
萬木變衰寒欲盡  
三陽乘候暗將催  
並經風雪名偏亞  
獨倚闌干首重回  
委分東皇看繫落  
要門璿樹幾蒿萊

舟過雲莊

木蘭有約遯回溪  
酒熟村莊許自攜  
雨住峯憑雲出沒  
舟行天與樹高低  
寒餘野蕨生還短  
淺落江魚見復迷

便老一閒身却病草堂空著瀼東西

贈潘憲副希周督海道浙西

山匣青萍價舊高外臺風紀屬時髦未言地接巖廊近  
且得身離郡縣勞化及炎州消瘴癘威行渤海肅風濤  
龍山石浦無傳箭不信書生擅六韜

哀宮保九峯翁

暮年相見本無期起落新朝兩舊知悔却班行催老大  
轉於床褥話分離昔懷有泪金曾鑄遠訃無音鶴尚疑

一老典刑中外望卹恩非為郢人私

倦客平陵賦繭窩到門黃紙重如何勉隨星使瞻雲日  
却憶山人就薜蘿夢易已憑占數盡啓衾真自覺心多  
景仁君實肝腸話老泪溪頭洒逝波

山莊

萬松深處結茅堂雞犬相聞亦我庄已礙鄉名還屬鄭  
未緣墮姓不隨王住山城府元無跡守業桑麻舊有場  
披豁荔林坐忘久角巾時帶野雲香

初晴

沈冥書卷歷陰霏忽起山堂望翠微風日隔簾花裊裊  
曉嵐別樹鳥飛飛滑深泥磴脚無力綠淨沙畦藥正肥  
帶得紫筇閑傍險素屏高處步晴暉

偶興用杜崔評事韻

習靜雲庄絕送迎綠陰濃濃處漏微明敢論素洞無餘寄  
只為青山不到城幾月交親渾信斷百年吾道未身輕  
檢方修藥周方外閒傍山坡引犢行

夢侍經筵寫懷

老愛雲庄畢素緣  
覺來天上夢常懸  
垂衣聖主顏如舜  
應錄山人骨已仙  
日繞法筵宮扇引風回  
輦路御爐煙夢隨  
賜食文華後細檢周書無逸篇

賀楊宗伯月湖致仕

長鴻天外信誰留  
珍重山人故倦遊  
作雨已收雲滿洞  
感秋應放雪盈頭  
四儒正學加尊信  
二傅高情遂老休  
得謝尚書還給俸  
轉於何處覓巢由

素臺所見

鶩織蛇蟠徑路迷古松深處結幽棲寫從縹渺歸來疾  
天入蒼茫看轉低怯老不隨山屐盡懶眠真約野雲齊  
適時西澗花還發風景依然似浣溪

壽太保九峯翁用壽幸菴韻

訪落新朝詔命同兩心江漢共朝東故人別社先春燕  
舊客長天感暮鴻綠野開園重有約白衣給俸獨何功  
典刑一老青峯下蘿屋蕭然領世風

憶昨論心古意存老酬完德荷殊恩紀綱六職行機總  
咀嚼羣經入本源輔德盛傳新政異拜官應帶舊衡尊  
陽春一曲相望地風景依稀似午園

寄顏司寇梅田翁

野客重來最厚顏金鳴時置左縣間文於老去如逃責  
身為行難轉怕山桑影扶疎朝日上鶴音縹渺暮雲還  
丹青未穩官衙席天上神仙屬押班

溪堂偶成

最陰森處一溪堂天與山人住小庄風挾潮聲來遠嶼  
雨移雲氣上晴岡桑田隱約經三變野鶴遨遊領八荒  
進履青壺參妙訣洞中日月此教長

錫宴次韻

太老石翁楊先生少師四考加太傅力辭勅  
書褒諭錫宴禮部適公誕之晨九列俱陪公

紀二詩傳至雲莊次韻

秬鬯明禋宛舊儀大烹傳賜出前墀南宮讓席承偏重

中使分庖散轉遲獸舞鳳儀呈雅樂天申嶽降會昌期  
榮陪媿少耆英後飽德同歌既醉詩

平章禮絕星辰上燮理心懸夙夜時曠典特從昭異盛  
縕恩兼為誕彌私經綸歲久四朝屬版宇功深九廟知  
最是保恩平格在謝歸客放赤松師

答周八庄謝閩果二詩用其韻

晦老題名石尚新故枝猶識宋時春席陰未覺年年盛  
摘實翻憐顆顆勾風味僅隨秋白品市聲空鬪早紅塵

繡林延壽應無數合是溪橋一本真

誰家名果惠山堂分致應傳屬大方吏部朱櫻容續譜  
右軍青李未隨行玉枝裊裊臨風摘金汁油油帶露嘗  
夙歲京華曾識此天留奇種遍崖傍

贈太老石齋翁致仕

禮絕官僚識羽儀九重動色注東墀手扶日月中天上  
志在雲雷下直遲大老忍堅違雅尚太平深切望來期  
錦江烟水行藏外潞國人傳有賜詩

位極功高謝亦宜眼中曾復見同時鄭公人國心偏重  
呂相兒孫福自私憶賜黃扉麟幾易得來青社燕先知  
三楊相業圖形在共指凌烟識帝師

茗川為徐子明題

憶卜城中已歲年故園雲物尚依然神清不斷愛茶癖  
官瘦真無食肉緣龍焙禁前收紫笋玉塵銷盡見清烟  
菖溪一水來天地自在中流陸羽船

食延壽紅金桃再次八厓

歲歲年年話食新  
歷來五百尚餘春  
珊瑚珠綴油幢滑  
孔雀錢開寶扇勺子小  
離家曾錫類肉香  
擲地不沾塵  
近來市井攘名姓  
風味從嘗恐未真

小園覓果旋開堂  
天上傳來和露方嘉惠  
夜煩青鳥使  
素香春伴美人行  
分甘俟圃瓜時熟  
飽德賓筵黍後嘗  
最是品高防預竊悔  
非苦筍遍山傍

贈太老蔣敬所致仕

一柱頽流勢盡東  
碧天寥闊見飛鴻  
名於星斗歸耆德

功在朝廷倚慤忠國史特書唐上相鄉人初識漢三公  
官舟泊晚龍闕下猶記南征涕泪中

歷盡艱危字縣新漢家柱石舊元臣翼龍雷電擎天手  
刑馬山河相國身道在必行功豈計老於決去疏還陳  
麟袍博取漁蓑月樵鹿曾論夢與真

雲莊菊日起巖必東諸賢過訪

有約臨滄訪翠微踏晴林鶴故相依小山叢桂花初密  
佳節重陽菊尚稀月轉半岡催送酒風回別樹笑傳衣

不禁短榻孤眠外猶起高情數啓扉

老愛登臨足力微少林桃竹轉深依重陽物候今能減  
四妙風流眼似稀把菊近隣還送酒對床有客感留衣  
最憐薄晚青山色獨對床前白板扉

遊鳳山

野水橋邊竹正蕃據床有客話寒暄白雲滿地僧開逕  
芳草無人鹿到門海氣隔林峯突兀鐘聲催月寺黃昏  
菊花況及重陽候細酒溪魚出近村

宮人入道次韻蘇州韻

落盡桃花色已衰  
內家紅綠遍前墀  
繡經幾意能成道  
覽鏡當年悔畫眉  
紫府疎鐘人靜夜  
珠庭香几夢醒時  
雲和不信人間曲  
青鳥翩翩髮正垂

喜雨

屬耳雷聲勢轉狂  
雲霓望望正江鄉  
鶴知天道團雙井  
雀入田家住滿梁  
屏翳化來衣漸白  
熯炎消盡氣初涼  
瓦盆近報村酤熟  
沾濕相遇也未妨

贈次峯次陽明韻

假寐官齋作晚晴雷陽何意動先鳴眼間世事祗如夢  
海上風濤故未驚沃壤不殊忘在客好山無數重茲行  
聖皇孝理崇堯舜驛使傳來是吉聲

如面人心豈盡齊危微精一屬叅稽四儒歿後留遺響  
七聖途窮待指迷海邑言游今禮樂越裳職貢舊航梯  
桃源此去無多路老愛相從是建溪

和韓太保洪洞相憶韻

桑海門前信閱三故人山北又山南四朝著蔡心俱屬  
一壑風煙老自堪水岸碧桃花短短月庭青桂影毵毵  
極知天意垂仁壽寬與耆英作盛談

再次重陽韻答汪石潭

白氣橫空暑力微海鄉黃樹正依依子安詞賦今能幾  
元亮風流世亦稀慰老秋容應晚局感時寒具且新衣  
龍山得酒還乘興看菊西鄰一扣扉

癱廢床褥一夜不能寐感懷

問野居然見異同此心江漢共朝東上天下履經維外  
死別生離感慨中已悉華夷知大孝幸垂日月照諸忠  
湛恩豈斬輪臺詔寬與孤嫠泪息紅

甲申冬右手足忽廢彌月始復書懷

柴瘠筋骸已自知却分右半與偷兒恐書絕筆獲麟會  
尚想張翼獵兔時人面每憐夔一足山堂空憶樹連枝  
適來藥物功尋奏約伴雲莊重有期

病中憶石潭昆比季

為纏末疾歲將窮過盡紛華與化工細草煙村懸抱犢  
碧江秋水見歸鴻吟邊野色雲晴外竹裏棋聲午夢中  
濩洛素懷深耿耿倚松無語對西風

偶述

散盡輕寒與木綿踏晴隨意歷風煙新桃得酒銷春帳  
老屋臨滄結素緣食荔每憐天一借服松真許訣相傳  
何當石枕雲莊下讀遍南華內外篇

甲申冬地震畫黑紀事

自冬積雨春仍似地震晝昏殊可憐南下奏書方幾捷  
壯來消息又三邊乞山不斷憂時感脫屣終拋住世緣  
最苦斯生無酒量未由長醉謝焦煎

望壺

老足蹒跚出轉慵故懷長寄最高峯不妨發歲已春草  
落盡斜陽未暮鐘碧井流泉雜環珮紫霄雙劍削芙蓉  
雲莊只尺移情在不及南隣地幾弓

感春

老猶不斷是凡情枕上殘書結死生郭外好山頻入夢  
庭前芳草絕經行風飛素雪消青鬢春盡寒煙鎖畫屏  
西北甲兵何日洗勉扶林野賀升平

見素續集卷四

欽定四庫全書

見素續集卷五

明 林俊 撰

七言律

東匯感事

病坊雌伏轉關情  
東匯扶行景亦清  
立鶩野田明素雪  
亂蛙塘水答新晴  
人家幾待桑麻熟  
海賈空傳米穀平  
聞說村村曾舉火  
出門割愛重吞聲

壽從子仁卿

子梧穉竹上青煙轉瞬風光六十年服賈食家儒固在  
主盟睦族義仍先車船五鬼無窮送魚筭千心有孝傳  
子姓行中吾獨許勉將情事對皇天

病嘆

藥力何神造化爭雨深足重轉難行老於忘事宋華子  
壯不如人鄭燭生追責乾坤良自信息緣晝夜本無情  
雲莊一席棲玄地風起濤來蛻亦驚

賤糴志喜

積旬風雨作春寒是處平流瀉激湍南野煙花愁外望  
小庭月桂病中看照瘢轉見催租急舉火翻憐度日難  
晨起忽聞開賤糴老懷重為放情寬

世壽堂次韻

倚江巾幅拜孤南掩映神光此盡涵壽種素風傳老大  
法筵黃釀酌芳甘下來海屋籌應滿歷到乾坤玉已三  
欲向周家看淳質青城路斷幾容參

次喬白巖謝寄山巾

山入石屋帶雲開舊雨時時夢往來分去葛巾籠日月  
配之蒲蓮謝風埃獨行栗里名偏盛小製伊川式許猜  
脫盡寰區與煙水不煩宿留向東萊

次汪少宰咸齋用邃翁見懷韻

竝枝花萼映東樓夜夜神光燭上頭二陸文章當代盛  
兩蘇情事古人憂夢回碧落聞孤唱清入滄浪有釣舟  
泊醉葛溪秋色裏不知山月出還不

病中用前韻自解

異方誰與授神樓坐久翻疑膝過頭三尺腰圍驚太瘦  
百心藥裹動深憂悔孤雲寄登山屐幸理風回到岸舟  
最是淵冰餘日在手編曾記了殘不

次張方伯兩山登丹霞

洞門有客試荷衣忽報修琴野衲歸風挾泉聲過子院  
日移霞氣上禪扉仙龕一種書還異靈谷千年韭尚肥  
靜裏乾坤真自得玄談誰了俗塵非

登麻姑山

老於歲月去如飛與客隨緣叩板扉汲取玉泉淘野飯  
製來絲葛試仙衣辭榮忽覩擎天柱搜勝誰貽放竄礲  
隔斷塵區酬舊隱渚風沙月未相違

所見

誰以無涯混有涯百年吾道大方家力難自可安巢拙  
波斗何須較轍斜筭老每憐餘景迫策羸真覺去程賒  
雲中鷄犬今何處莫漫尋真嚼紫霞

雲寄紀懷

短藜扶醉冒林霏  
線路登登轉翠微  
覓靜頗煩神獨往  
慰懷真愜老相依  
移來松桂生還密  
羈住山雲出便歸  
假寐石牀動村鼓  
夢回猶覺世情非

送汪可亭節推報政

嘉石衡量法許平  
海鄉隨處絕冤聲  
饋鮮偶值懸魚在  
入覲真憐鬻馬行  
九石潭邊度梨嶺  
獨峯江上見桐城  
名公行列來賢事  
碧落秋高老氣橫

過訪雲莊

次第長林起曙煙  
跛羸扶上木蘭船  
水紋細皺魚常躍  
野色荒涼月尚懸  
百丈分流入南浦  
千尋積翠起中天  
莊前荔樹生來合  
叢桂花開總自憐

寄金蓉溪司馬

鵠立仙班識羽儀  
孤忠端荷四朝知  
曉臨楓陛旁看壯  
秋入蓉溪舊有期  
西夏安攘經國計  
內廷獻納蓋臣私  
浮雲野水寬閑外  
沙塞無塵屬遠思

書懷

壯遊三辨乞閒身詔起翻於老出貧食力樂還干筆研  
竭愚猶擬答消塵兩間獨復求真我一席公參對野人  
雨節風時關泰運八荒同幸泰平民

二泉問無書和答

病坊啼鳥各煙蘿相憶時時夢一過月裏仙舟誰李郭  
花前詩句自陰何海門風起連魚斷秋日詩來對句歌  
藥力不酬身轉瘦過橋巾影落晴波

倚秋高閣上松蘿載酒時聞有客過風月幾人似陶謝  
春秋有筆罪王何年催景莫愁曾結病起詩難強為歌  
十二行窩遊樂遍釣徒還擬歷煙波

曉日遙憶

九達夜色尚濛濛多少衣冠禁漏中鴈影星河天漸曙  
鷄聲瀛海月初紅金貂次第傳中詔玉珮從容引上公  
一德君臣千載合老還猶擬附餘衷

七十五書懷

過鳥光陰可自由  
稀年五度又春秋  
淹纏世久心多厭  
樹植功疎意獨留  
遙望每憐平野綠  
得歸還記小山幽  
蒼苔碧石高閒外  
無據神仙莫漫求

次韻答李敘菴

風時雨節海平漫  
深有餘忠卜治安  
系出西平原屬李  
名於北斗共推韓  
清朝世運交還泰  
壽母心期老更寬  
愛日堂深強健在  
板輿花底副遊盤

次韻答喬白巖

結托青林老已衰孤卿南北擅真才舊人特首新朝索  
別夢從先故國回鐵石素心良自副菊松荒徑待親裁  
最憐妙覺當年會巾烏無因竊後陪

寄白巖少保

隨處開花又落花石巖未老結煙霞天卿舊沐四朝寵  
柱國仍傳八制麻自信行藏應有分極知歸去尚無家  
晉公綠野經行外瘦鶩時尋一徑斜

寄辛菴少保

薄有桑麻莫種瓜月輸半俸似公衙舊傳蓬島神仙宅  
重是蘭山保傅家架上軸多書尚積牀頭金盡酒還賒  
先零邃老經獻後物論煩公更建牙

望雲莊有懷

江上青林識舊村亦知竟歲斷來轍短筇細路春來合  
絕壁寒泉雨不渾移樹有鶯尋伴侶過家無鶴訪兒孫  
夕堂老憶陪隨地芳草難招聚窟魂

笑遣

老歸猶是舊林居隱几青峰一笑餘蜀漢出師元有表  
茂陵封禪故無書遺榮短景從消滅素節真鋼忍破除  
自是遊魂招未帖忽傳風馬與雲車

不雨述憂

吹盡高雲別一天驕陽舞禍故無前人間始信雨成玉  
門外真看海化田闔郡生存懸此日幾家事育應明年  
江湖老去知何用一夜西風雪滿顛

和鐵橋都憲夢余過郭西韻

千仞峩峩覽德輝地分閩粵重相違故知水斷無魚到  
却望秋高有鴈歸調絕幾容尋杜句菊香還擬著陶衣  
龍山薄與青雲近竹杖人扶力尚微

次宮保質翁哭如賓韻

東閩川嶽會神奇及冠操存俗已移張陸忘年君與我  
孟韓知己世還誰道真自信貧能樂物候翻憐老易萎  
過盡城更寒轉寂月斜孤影鴈垂垂

赤日相從一問奇短床時傍柳陰移譽流海宇今猶在

行貫神明眼復誰榆景鬢疎兒樂抱萱庭秋重母先萎  
閑門尚記征西日舉武無從老泪垂

贈族弟世崇

世錫瓊林又子同廣文上考僅從東鶴聲曉度梅花月  
鴈影秋隨蘆荻風驛路易聞京國信講堂偏識布袍窮  
眼間通塞居前分造化無言屬至公

祝篁溪鳴和惠詩次韻和答

人世浮名紙一張覺來深戢與雲藏詎知歲儉雨如玉

到得秋收粟幾房膚使隨行懷靜切老人蘊結夢仍長  
食稠斗米曾論價坰野霜清子鴈翔

再次望溪韻

風望稜稜屬弛張滿前豺虎盡消藏斗間紫氣劍三尺  
仗外虹光書滿房執憲每推周舉右作詩還坐景猷長  
清時一第收來蚤聞說諸生價已翔

相隨白鹿戀分張知有神仙是處藏古洞顏霞騰羽蓋  
緜簾初日照芝房閱來風景頻年換看到兒孫似我長

石枕孤眠晝無事海天高鶴任翶翔

教二子

一脉真源世不孤亦知混迹未迷途機圓翻信巧成拙  
墨守終期智破愚幾辨義田隨二范別尋文派附三蘇  
相仍仰止瞻依地留與諸孫作畫圖

即景

十二芙蓉江上峯夕林秋影坐來慵雨昏素幔妨歸燕  
雲起澄潭有卧龍漁父欲尋桃洞入野情不博酒泉封

一行鉅老裨新政却愧青邱是故農

壽左司馬山齋六十用翁自韻

辟穀歸來值歲週壽筵春餅嚼新柔  
山前雲物歸青野杖外花枝對白頭  
臺省望高行再召粉榆景好足相酬  
流行坎止吾儒分盤谷何勞問某邱

拄杖青邱分已踰畏途何處是停車  
斂浮已付雲歸洞習定真成水到渠忽報  
鄉垣纏象魏祗疑仙子住樓居董狐若  
問收遺稿猶喜都無封禪書

梅初豆

野寺行來春已遲  
隔牆青子重新枝  
老於摘實渾無味  
興在和羹屬有期  
東閣簷垂香外雪  
西湖譜續畫中詩  
覓音忽感花神惠  
月落星橫起夢思

五言排律

雲莊紀物三十一韻

老深酬懶癖  
幽勝屬莊家  
走院溪籐暗  
緣邱塢竹斜野  
草時臥鹿塙  
井亂鳴蛙陰  
壑蒲初筍破  
陀蕨正芽齧

令公蕪盤剥故侯。爪山柿辭殘蒂。峴梅落故丫砂。精霜  
候橘粟細雨。前茶壁檜懸絲紐。岡桃散錦葩。藥苗闌錯  
種石乳穴粗爬海。潤潮雙信蜂喧日。兩衙褰幃過林鳥。  
拄杖落巖花。鄰里鷄豚盛。晨昏鶼鵠譁。三陽時轉泰。  
熟歲仍加事。育差年。計輪迴。宛物華。土風存。梗概人語  
隔。煙霞兔狡何曾得。魚馴漸可义。抱寬餘垢納持少。斷  
汙邪。豪興閒還覓。頰齡促任賒。蒼精化猿鶴。綠骨幻龜  
蛇。末路看如砥。浮生似有涯。詩材衰愈退。飲量晚微加。

禮讓聞鄒魯懷柔憶漢巴歷危欺足繭乘醉岸巾紗風  
掣垂天翼星回貫月楂無錢具鮓米與客且桑麻齋集  
僧魚供膳分社鼓匏至音傳要妙大雅會亨嘉鬼鑿仙  
龕細柴聯棧道遐規規搜索莫頗頗謝紛竽學竊董生  
苦詞疑左氏誇帝臨收暮局一著敢容差

余仲栗約中赴海南道別

珠崖開粵鎮兵衛壯殊方鳥鼠馴諸洞蛟螭避七洋梯  
航周道路卉服漢冠裳解宇花梨柱人家牡蠣牆陶型

居士品繩引重官常蘋葉分黎飯椰盆咋蔗漿浦珠聯  
象郡夷馬湊牛塲羅密駢村市檳榔並舍嘗菓坊人面  
白酒檻樹頭香業往容仙分閒貽且國章颯檣經應港  
祝帛祀靈岡白浦通潮閣芳泉洞酌堂曠懷忘在客多  
景勝吾鄉守靜宜低屋填飢尚太倉鷄蟲曾得失鴻燕  
自行藏筆勢江山助圖經水陸長長公便老住伯紀惜  
歸忙天路夢千里朝恩字幾行不應船上鶴又伴北還  
裝

壽白巖用山齋韻

地紀臨西晉天官近北辰四朝文與武三事甫薰中龜組英名盛麟袍峻節新腹松符昔夢海鶴讓丰神翼俗清還淡堯風質更淳兩儀歸燮理百辟待陶鈞大雅垂臣鑒精忠動帝宸逆鱗排內降削稿疏南巡瑞日桃分露春煙燭晃銀仙班誰第一資聖繪中人

六言排律

賞菊次胡支湖韻

江雨畫蓬水戲夕陽萬徑樵聲寒猿素壁長挂老鶴青  
枝不鳴野客抱琴果俗秋花得句還清太無人管閒興

蕙帶荷衣道情

送草窓鄭司教森

薄技繆投鼯鼠顚蒙繼祝螟蛉伯仲常眉最白交遊籍  
眼殊青孤燭寒光並舍高槐綠蔭連屏千里誤騰快足  
九霄專養修翎調熟曲翻別引鼓多刃發新鋒遲回蒼  
璧酬價展轉丹砂乞靈獨對可陳董策晚收尚負梁經

歲儉陶瓶屢罄德馨顏巷初銘旌苒年翁漸迫吾伊夜  
子曾停極否終丁泰運後凋不博秋零芸閣香浮書帶  
風雩響泛鐸鈴騎鶴幾纏萬貫解龜續換雙瓶紫氣腰  
間劍室黃雲馬首旗亭咨目送迎例斷遙心帶鶴前汀

五言絕

題釣臺

地盤一股出山壁兩厓開鼓枻隨漁父乾坤此釣臺

題扇次允齋

獨客迷莎徑雙松直野亭巖泉虛更落別調不堪聽

題孫九峯扇次石潭

海日高低影風舟遠近程利名剛兩字雲水一虛亭

紅梅

紫霞欺素影紅玉帶青煙風雪濛濛夜金丹化鶴年

七言絕

李文正公割內醞為二泉太夫人壽次韻

傳賜金盃第八天黃封分致壽堂前啐回玉液通仙露

莫漫人間有酒泉

玉厨金甕出黃封，傳道師臣錫內供。  
不為循常割恩賜，異香清帶子情濃。

讀東坡李白辯

吾道網常有二天，虛名催逼漫樓船。  
潯陽合是江潭水，魚腹還應有墓田。

口頰勞勞枉亂真，謫仙曾道不從璘。  
仙才俠格知何繫，空有詩流浪漫人。

題扇次允齋

新籜剥鱗參玉筍小糟分蠶過茅柴溪橋隔斷非人世  
猶有山翁拄杖來

口占寄王金谿

沒膝泥平屬漏天尚難一刺直公前幾驚離合關情地  
又是東華送別筵

九峯扇次李文正公韻

荔帶荷裳小籜冠玉樓時聳兩峯寒白沙瘦竹移情在

一曲將歸石上彈

有所思口占寄楊月湖

入定僧高元犯俗出門人老未歸山碧天抱膝空庭坐  
羞見冥鴻海上還

七二春秋幾故吾一燈長伴兩身孤最憐雨雪寒鷄候  
不夢蘭波夢月湖

題畫

鬢髮滄浪老病翁小山時對桂花叢白沙翠竹逃名外

一棹江煙水月中

時苗留犧次三江韻

長育明分水草餘駕回元是赴時車帶非故物留何謝  
瘞鹿懸魚此例書

行李蕭蕭得代餘壽人猶識舊牛車寄來一脉明心事  
果日亭亭副大書

題仙

渡海天風跨鶴還漫酬老癖與溪山網常一種吾儒分

不放人間有許閒

地床茶竈隱晴煙洞口桃花不記年後老乾坤成底用  
名家別自有神仙

口占寄君俊

德星移照入南離物色當年已自知大冶釣陶荷明聖  
太平無處不相宜

簡方西樵

真主分明舜與堯追崇詔下復誰搖悔深鑄錯行藏外

紙合西山老聽樵

題姚氏園亭

野晴山雀亂庭柯  
門巷春深長薜蘿  
候葉時花幾年紀  
風煙猶識卧林窩

畫欄草碧與花香  
隔斷煩聲日許長  
如此風光藏老大  
平泉空愛睫前莊

與何燕泉伯子和文正公韻

望家深有典刑存  
奕葉相仍子又孫  
稽古源流今得信

下方仕牒上皇恩

父學師承更祖風駒龍雛鳳自奇童宗臣未說何曾事  
久在涯翁鑒識中

題馬

歲經壯壯與驪黃龍脊真能隘八荒石粟心多還自信  
直將汗血報君王

題鴈

春去秋來蹟許忙夜清涼月夢江鄉魚蝦即少差年計

留與人間薄稻梁

題四皓

一夜仙風吹紫芝  
道人同是出山時  
從今莫道安劉事  
主聖臣賢正作期

友古

學行焉敢望前人物  
化傳來局局新麗澤  
此心還自計  
欲將河洛代雷陳

酬朱孔年惠菊

畫船江雨帶風斜過盡重陽未到家憶昨龍山曾送酒  
對門今日是黃花

柴桑歸愛一身輕中路黃花到眼明不見芙蓉見秋水  
最難摹索是風情

和少陵六絕

畫虎心多愧未成老來空有氣從衡松根一枕羲皇夢  
如蓋山雲石上生

四愁漢調猶平子嗣響鄶炎格已休閱盡盆渠都是水

何曾日夜大江流

虞歌有派傳風雅漢選何名續楚騷嵇阮嗣音副人意  
也難摹地拜劉曹

漢魏名家幾世人調孤無力附芳鄰殘編斷楮誰收拾  
已化荒荒架上塵

九首枚生信復疑格中何必問吾誰正聲變盡愁無拙  
前輩終為後輩師

陶謝風流祇兩公後來韋柳亦相雄極知作者闕名教

不混王楊謫薄中

雲寄失足幾墮

老難筋力出應稀蒙密青岡取徑微石洞雲閒喜人跡  
故教藤刺強留衣

雲寄登登續往盟蒼苔路滑幾危坑山人老分天還鑄  
起傍獨高峯處行

見素續集卷五

欽定四庫全書

見素續集卷六

明 林俊 撰

奏議

陳愚惓以附餘忠疏

太子太保刑部尚書致仕臣林俊謹奏為陳愚惓以附  
餘忠事臣待盡海濱去京師六千餘里廷議大禮始徵  
有聞謹具一疏為乞霑天威以培養聖德事未進而詔

旨已頒臣尋中風疾手足不仁口眼失位遂就醫藥備後事繼聞有西北之報漕輓供億恐煩聖憂臣受知四朝敍復起廢者屢屢竟無能久於位以宣有微勞陛下新政之召臣衰以老矣又無能久于其位力乞休致顧蒙賜勅給役給廩歲時存問臣疏辭未允強顏登受臣今氣息奄奄安望久居人世者哉臣自按察使乞歸已無起望附墳臣父墓之傍備納蛇焉前項致仕恩典及身後塋祭通乞停免以為臣存歿之安臣又倣古人遺

直遺表之義僭有獻焉夫議禮如訟見各不同包而容  
之德之大也若粉墨太辨恐未足以服其心臣伏讀明  
詔仰見天地之大日月之明於斯有悔焉存卹敘復日  
候而久未聞也昔成湯改過不吝陛下儼德堯舜於湯  
何有哉伏望早降溫旨以答幽明慰人望臣又惟古者  
撻人於朝與衆辱之而已非必欲壞爛其體膚而致之  
死也亦非所以待士夫也成化時臣及見廷撻三五臣  
容厚綿底衣夾以重氈疊帕猶床褥數月淤血始消正

德時逆瑾用事始啓去衣之端重非國體所宜釀有末  
年諫止南巡撻死之慘幸遇新詔收卹士氣始回不謂  
又偶有此臣又見成化弘治間詔獄諸旨惟叛逆妖言  
強盜好生打著問喇虎殺人打著問其餘常犯送錦衣  
衛鎮撫司問鎮撫奏送法司議罪中間情重始有來說  
之旨部寺覆奏始有降調之旨今一槩打問無復低昂  
恐舊典失查非祖宗仁厚之意即此二事似宜循舊臣  
又見去歲以來舊臣謝遣殆盡朝著為空近聞石班又

欲休致伏乞聖明留念既去者禮致未去者慰留與數  
三大臣時加延接又有碩望如羅欽順王守仁呂柟魯  
鐸輩人乞引自近以裨聖德圖聖政臣舌梗意長授書  
難盡無任懸結愛顧之至

附錄霽天威養聖德疏

臣衰老乞歸勞瘦大作形容變盡殘息僅存常思古大  
臣致仕憂同在位富弼家居朝廷大利害知無不言趙  
槩集諫林百餘卷以進臣心慕焉思有以報之陛下也

近聞廷議大禮異同上干宸怒恐包荒之下舉措涉輕為容納一欠臣安得謂在家不知乎謹昧死上言易渙其大號言號令如汗之出不可反也今大禮數反汗矣興獻大王初議也興獻帝再議也本生恭穆獻皇帝三議也皇考恭穆獻皇帝殆四議也魏元帝本生父燕王賀表稱臣帝欲尊不稱臣有司議聽如舊式惟中詔所施曰皇帝敬問大王宋英宗服所後喪三年畢始議本生濮安懿王典禮繼以集議不同報罷祇封安懿王

長子宗懿為和國公神宗時追封舒王天下後世俱未  
嘗非之今三年四議矣陛下大孝無已之情可對天地  
質鬼神無愧然有禮焉以節情也禮人子有終身之喪  
忌日之謂也夫罔極之恩終身服斬無過也然終身服  
斬世幾無吉服人矣故聖人定為三年之服服終釋吉  
節其情也忌日哀戀終其孝也今四議者臣反覆思之  
未得其說求之天道臣不能知也然災祥之應孰多孰  
寡寡足思也求之人言臣不能知也然從違之論孰寡

孰多多足思也求之祖宗臣不能知也然冥冥必有所屬意在今議議是也萬一在於初議再議三議則尊祖之孝足思也求之恭穆帝臣不能知也然冥冥必有所屬意在今議議是也萬一在於初議再議三議則順親之孝足思也又求之事亡如存之義孝宗恭穆帝假幸俱在孝宗倦勤傳位武宗自稱太上皇武宗崩傳序陛下恭穆帝亦自稱太上皇兩太竝居大内歲時聚會果平等禮抑別禮一位大内一位故封歲時慶賀果平等

禮抑別禮則如存之孝足思也又求之喪服之制人後  
之義父則斬伯則期庶民受所後民業稱父服斬致所  
專也帝受所後帝業若稱皇伯則與常伯叔乎等孝宗  
意欲稱皇伯不欲稱皇伯臣不能知也古天子七廟三  
昭三穆與太祖之廟而七一太祖二不祧四高曾祖考  
無皇伯之廟則嗣統之孝又足思也王天下有三重議  
禮其尤重者中庸謂本諸身有其德也徵諸庶民驗其  
所信從也又考諸三王建諸天地質諸鬼神百世以俟

聖人無一不合然後動為世則彼無惡此無射雖有譽  
於天下其慎也如此武王聖人也老方受命周公始成  
文武之德制禮作樂追王太王王季其緩也又如此伏  
皇聖明再加周慎遲以歲月俟閣下禮官諸臣議定孝  
既足伸禮亦盡合舉之未晚臣又惟人君以寬仁為德  
剛正為威保宗社安人民為孝方孝隆本生推心以弘  
孝理之際而威懾羣議恐人命涉脆傳播四方未免聖  
德之累悔無及矣乞霽天威養聖德公大政使至治上

達馨香發聞上悅天心下副人意幽而祖考咸格聖孝之大無出於此臣垂絕之言無任懼切効愚之至

効遺直以畢餘忠疏

臣至愚極陋無他行能徒以朴忠自結列聖陛下龍飛之初首以舊臣名輔新政深慚衰朽不任驅馳八疏乞歸荷蒙眷注既乃諒臣誠懇勑允致仕恩禮繁縟實踰素分臣歸未樂未疾遽作屬者勢轉危迫命懸旦夕翹首闕庭無階上答然既死餘心尤望陛下懋志聖學留

心孝理信任忠賢廣開言路持端拱之初心收嘉靖之  
盛治尤願陛下保養聖躬調和元氣使前星有耀皇儲  
以蕃臣生已無期徒存涕戀死若有知猶荷太平臣又  
惟我國家顧念舊臣葬祭有恩向已具疏辭免身後恐  
或誤蒙賜及伏乞通行停止以為臣心之安此又臣垂  
終之所惓惓也

見素續集卷六

欽定四庫全書

集部

見素續集卷八

詳校官中書臣賈 燮

中書臣劉源溥覆勘

覆校官中書臣汪學金

校對官助教臣蔡 鎮

賸錄監生臣王秉鈞

欽定四庫全書卷

見素續集卷七

明 林俊 撰

序

贈少廷尉黃后峰

國家承平久禁弛慮疎三渠奸詭惑以窺伺神器瑾誅  
死彬與寧固在北巡復南巡也國勢如一髮引千鈞孰  
敢抗聲大義以擇肉虎口者哉黃郎中后峰疏六事皆

同官陸汝亨以進諸司響和並下詔獄為禍且不測余  
諸孫以乘復疏以進廷跪廷杖死者十二人后峰幸不  
死彬甘心焉變姓名亡匿僅免鬼神者固有以相之矣  
宸濠叛武皇帝始下寧獄慈壽皇太后復下彬獄中外  
人始席為帖上入正大統首列更始之詔復諫者官卹  
其死事誅二奸並連其黨於是后峰有南少廷尉之擢  
嗚呼謂世無士非誣歟后峰倡之諸司羣和之新政苟  
發重有翕然者士氣盛國家元氣亦盛識治者卜世焉

余初聞后峰疏曰是無澹菴封事日月爭光者歟分一  
死與龍逢比干遊無異也為之私幸又幸不失后峰盛  
名難居然哉鬼固有以破之疑后峰懷負純完記覽精  
博脩飾謹而進取澹無患難居昔鄒浩諫立劉后除名  
其友田晝謂曰士所當為未止此也后峰當為固未止  
此其浩然之氣固在無俟余告也命既下后峰謙讓慚  
怍余曰新天子搜選忠賢為寃人倚命所謂千載一時  
者近卿雲現壺山識者謂至人在宥蕭士彙征之應后

峰時出之以茂贊無刑風發善類以發靈山嶽至寶積藏余未知其可松崖諸君子曰然序速君君無緩焉

大方蕃祉序

大方蕃祉圖圖陳氏也大方石峰官稱也啓祉於先席祉於後萃祉於一家一時焉故曰蕃祉也陳世厚達處義窮處分如彥回公徽守為烈也如居易公醇質自老以竟被官封啓陳氏公昆季五人不圖圖存也為公壽也諸子諸孫不圖不盡圖也有石有松紀壽也亦紀節

也有竹紀祖孫父子也荆紀兄弟也坐左者公右季方  
俟軒也儒而巾衣降立旁左者伯子會仲子翰也抱自  
西階指若顧若趨而前者閭孫也所貴於世天倫之樂  
爾矣禮父子篤兄弟睦家之肥石峰不有石慶父子之  
美者乎不有姜肱兄弟之美者乎俟軒不有王凝素業  
之美者乎易子克家詩纘戎祖考會翰不有元季二方  
之美者乎閭不有召公是似之美者乎石峰平粹暇整  
邃中闇外廉不近名而厚不易正自侍御懸次卿貳者

久以忠觸禍起連擢數月而至左方過家有舉孫之慶  
於是乎公六十矣百順皆備其幾家幾人哉天之所助  
者順也君子思以靈承於天積故久久故大大故備履  
之上九曰視履考祥其旋元吉壽考昌大固其所也然  
積非一人一朝之故而亦有小往大來吉亨之時閼宮  
頌僖公也頌僖公必及魯公莊公君子有以論其世洪  
範敘建極也敘建極必及斂福錫福君子有以論其時  
石峰有開自先有積於躬者故厚以當新天子纘圖啟

泰以受茲繁祉重非偶然者序斯圖并其至俟焉圖者  
峰湖詩者松崖山齋數君子序予見素某也

緩流易退序

秦君樗菴從節甫閩憲謁我雲莊亟道所欲去之意余  
意其與時消息有託而逃爾矣新天子聖神天縱承序  
當陽道君子乎長君猶去意如初如水赴壑挽之而不  
可回夫雲雷經綸奚居獨言去拔茅茹以橐奚居言去  
其未由臆測也君曰余殆有徵諸盛替之微與進止之

幾者矣秦上世無顯者是之謂遜秦斯之謂壯壯斯晉而明夷系焉亦其數然者宰物者其容以哀取哉余伯氏蘭軒從簡暨余暨叔氏幘峰從熙凡三第進士蘭軒幘峰晉六二受茲介福余六五失得勿恤象也然亦載罹於夷垂翼下上者殆茲二紀今雖長風上征無復孤舉之志且並影聯飛余退然其在後余斯起也伯倦還叔斯起也余倦還亦其數然者數道寓也羊舌氏兄弟之美人謂處顯兩尊余兄弟並仕籍而解驂臺省曳杖

丘樊與漁流耕叟相周旋足樂也昔錢宣靖之退也地  
要而時乎蚤余散一臺察踰五而還其惡敢班哉緩流  
易退志吾過爾矣余曰是何擇於緩急者哉道爾矣急  
為退緩亦為退勇固道易亦未害為道犯激灘抗怒濤  
不寸進淪胥以溺視易退何如君笑而不答君台人台  
相襲氣義余識蘭軒載識樗菴也序其然

毛氏兩節詩序

國家必有世綱人紀順其天常義烈貞風固其時化使

所天不移懷二心者無立地既死猶有餘辱也夫然後  
天下之為臣子為婦者定而羣正宗之百順集焉肇國  
啓家其偶然之故哉余監滇南之明年為弘治己酉有  
事文闈比四鼓閱一墨卷登落屢之意未有所決余曰  
神疲矣寘几格間黎明再閱光炯彪發意大有所至抑  
世德有相以然比揭曉為毛君玉問其世無顯者家亦  
無足垂仁意獨為得士兆爾既進士為給事為之私慰  
久之又得其兩節之詳毛世德有是往夕之事殆非偶

然者毛為良鄉右姓洪武間從讓從征滇南留戍而天  
時劉始二十有四歲鞠孤義以長義夭魏始十有八歲  
鞠孤瑀以長兩夕霜晨嫠苦相呴濡為命猶母子也魏  
曰姑喪所天寡弱萬里外其誰與親姑難劉曰婦喪所  
天齒尤少婦難又曰以義以命無難又曰移所天者其  
不良佑也且何面目人世天固毛氏諒也鞠瑀以乞靈  
於天瑀存姑有孫婦有子螽斯有地毛之鬼血食其不  
存如天何哉匪石之心其不可轉也魏曰然君子謂定

從讓初成妹之壻牛與偕既夭牛代之瑀長牛還之時  
牛植有家或教瑀訟劉不可魏亦不可君子謂之貞而  
世典多漏懿烈弗旌故有是惜也獨兩節然哉易節之  
六四安節亨困之上九困於赤紱乃徐有說毛竟家以  
完兩節以壽終孫子蟄蟄瑀被有給事封命給諫務持  
大體華實芬沃遠至有階兩節之啓祉不誣冥冥者其  
有以先告也書為毛氏兩節詩序

鄭雙石赴召贈篇

士君子運同仁藏獨智有先時之退有循時之進與道  
消息者也雙石於成前是之疾非身疾也而獨引為疾  
今是之可非身可也而同與為可雙石之隱余無得而  
知也雙石無半畝之宮數弓之田官下大夫位任卑散  
祿升斗以自潤棄而違之君子謂守守藏智迨是遭際  
新天子釐革庶弊搜進名賢得聖人之時檄書敦迫雙  
石幡然起抱袍裹糗車馬有行色君子謂達達運仁易  
遯之六二執用黃牛固志也泰初九拔茅茹以其彙征

吉志在外也雙石有獨遜之志而不失相連而進之時  
前是之歸不以貧自沮今是之出其不為貧而仕較明  
矣雙石有廉特之操凝遠之資身心體認之學卑散以  
默任天下之事士夫所與余老腐所畏也他日之至其  
誰則禦之雙石諒不負所學負聖天子計亦不欲負士  
夫負余也竊瀆告焉夫不易者道而易易者情士窮經  
學古以立名於世其始不出羣聖賢之成言往行比其  
用遂遼絕事負其言後反其前斯情之過也制情所以

入道雙石乘期應會連引同彙之賢討論其大經大法  
同聖賢者因之異聖賢者革之雜者純之偏者正之未  
振舉者奮勵之以上贊元僚効為德宣沛覆下之仁以  
弼成正大光明之業其端在此斯雙石之素所以望雙  
石也

贈平厓序

尚幹之林德厚長世平厓世父雙松翁介父葵軒翁積  
官大小方伯父一樗翁舉於鄉不應禮部試以畱餘造

物羊舌氏進退兩尊然者茲文服有御史封命羣從圭  
組殆東京之苟陳為近平厓專志古學在諸生無知者  
一日錄近作見我雲莊為之斂畏平厓惡從得哉六經  
其原史子其變瀦而後洩得諸心而應之於其手汨汨  
然來矣別時時念之他日以語少谷少谷不知也歸而  
覓平厓自恨相知之晚來書曰平厓城中所無余曰將  
閩中無爾平厓名遂起第進士又起御史裁數月忠鯁  
聲遂動廷著平厓副余知其亦不負余望也世固有持

論無前者而屬事輒局寄言輒悖臨小利害輒改慮而易素平厓固懲諸此矣東巡有事無徒清弊源塞利孔為鷹揚虎視之威殆有百志元醇為太平地者夫惟簡也常重網間漏夫吞舟而明察淵魚亦識治之所宜戒也明道拾遺補闕之論神宗謂為得體至論人主當防未然之欲神宗俯身拱手曰當為卿戒之君子治化之本君身正者無不正者斯大臣宰相之事其獨一臺察間哉平厓試從事焉又將不獨閭中所無而已平厓武

名克相字

叙以賢行

吾家以賢貳轉運使也乞教言於我曰有祿屬型範於  
我世父諸父維莫之似而恃以無墮焉者竊有甚爾矣  
記諸生偕豫齋困齋龍坡麗澤以賢方以孩孺玩弄掌  
股間長耳方面雙眸炯若余隱度是無煙樓撞破以發  
名成立踵吾家江陵者乎既之果然迨貳守瑞郡適值  
華林之寇余隱度是無湯溫滌渠兌以靖有斯土艾軒之

尅平茶寇者乎既之果然其載貳安慶也猝值逆濠方  
張之勢余隱度是無邵州之抗聲大義孤城自守顏果  
卿之牽拽平原賊進不得窺金陵退而一敗塗地為烈  
也是時三數文武臣共事畫奇決勝以賢功為多而第  
庸晉秩顧若有不逮於常調進若却速之而顧若淹吾  
不知於以賢何如也然朝命甫下輿論籍籍以賢之信  
殆發機於此矣奚必食真封穹寄顯授然後為快耶先  
是南巡之沮吾家以乘分百死羣忠後處亦以左吾家

之道其亦殆然者君子求在我屈與信數也淮南茲往  
將以賢謀焉鹽筴之利自齊始官自漢始自宋而蠶至  
我明正德之間極矣嘉靖釐革始駁駁然舊觀夫頑山  
煮海淮南七十二萬之課利權伸縮固有移夫彼而不  
恒屬於此者矣夫河流萬派故道屹不可尋百蠶一葉  
則亦眇之遺利以賢杜私門塞敝孔搜剔耗公之故而  
一與之節使時化無干吾常以承有裕國實邊之匱以  
無貽當寧內顧之憂以賢自有信抑信固在耶以賢行

送孚可弟叙言

翠庭乎可以四川總憲有行謂余諸兄行同筆硯且稔也願聞法言余曰余言惟法余亦乃法惟言夫法何為者也夫法導民所違就而昭其畏者也是故有法畏有畏法畏法者已畏也法畏者已畏而人畏也人畏也者非文深立峻震之而後從也稱物平施民無犯焉爾矣已畏也者非守墨善晦抑縮以成之也擇足而趨周慮而動法斯行焉傳君子有已而後求人無已而後非人

余法吏也持之以今蓋未嘗一日闕焉忘斯畏也孚可  
之畏無亦余同乎監司者諸道守法之地使也者吏之  
長而民之程也已所弗畏民無程矣奚其畏豈惟夫民  
之無畏報以庶尤得弗辭乎其罰矣奚其無畏故衆人  
以弗畏入畏而君子以畏立畏其分審矣孚可之畏無  
亦審此也與孚可學得之殿元公司教公守得之郡丞  
公而立孤養重言動無所於苟鄉稱古君子無易一時  
羣從三進士畏謹如出一人孚可歷御史憲副叅知所

至威惠並流而卑衣糲食猶故寒士知自畏也而諷謀  
於是役也谷虛川流威濟而化行法舉而程以立蜀於  
是乎有餘懷矣獨畏已乎哉抑有畏者也有無畏者也  
吾家邵州之抗闢也礪石視頸若兄平藍曹且鵠刻之  
未竟無畏之收翠庭余畏弟逆瑾時獨不溷俗化為士  
夫完人將視邵州為烈吾林固有人哉書為告

贈吳師夔

甫之吳仕族也師夔上世再發解首其四取上第曾伯

父主事公取進士以問學名曾大父大父邑博公以孝友著君無易風素吾不徵諸文徵諸本清穎秀發吾不重諸其外而重諸其內師夔含咀醞郁取第甚早不屑屑循次大學一不利禮部拂袖去及是三舉不利又去余追止之曰乙科亦仕正途上世楊文貞公魏文靖公並起師儒師儒亦未可易視也子之母老矣祿仕以逮親也化與政勞與逸殊爾成己成人一道也絃誦與簿牒孰清對子衿與鬼魅吏語誰適呵叫敲朴揖讓而雍

容者有間也且教之職師夔家世物世德以正士趨世  
學以端士習其外取為哉師夔吾愛也吾無隱於汝夫  
學然後知不足教然後知困師夔誠盡讀天下書盡窮  
天下之理其富如武庫如撞鐘寸莛大小隨應然猶未  
敢自足畫地而限與盈沼而盈者可鏡也師夔殆將徵  
前之恃以為今之償惜陰繼晷遠紹旁搜師夔之至將  
不止往日師夔者矣師夔官金壇去吾友邃菴翁卯橋  
踰舍邃翁無書不讀無物而不格師夔師人亦將師諸

人昔子朱子既仕始及李延平之門自幸得師師夔幸從翁而學焉他日之至又將不止今日師夔者矣

贈鳳山秦公南尚書禮部序

上嗣大寶之二年用戶部侍郎秦公官南禮部尚書部尚書九峰孫公率部諸君子求贈言於見素義無辭曰斯公也吾與與也斯行也吾與處也大江之南錫文物為盛錫大君子邵二泉公既又秦鳳山公德樞而繼譽茂而齊乃劇有聞焉乃後獲與於二泉乃見公京邸時

公登進士官戶部屬部尚書韓洪洞公試業考行公乃重政乃舉乃脫疇拔僚焉後官河南提學副使督育崇朴罷游黜靡士乃就政乃益舉焉官湖廣巡撫都御史激風申憲樹善而殲惡負勢者憚抱材者起含卮者無蓋政乃滋舉焉後官戶部侍郎部尚書九峰公為公謂某曰公諳習故事疑詢刃解出入金穀平允弗傾而彌邵於昔於余有力政乃益滋舉焉是故九峰公數數上疏求去大為公地若避路云茲禮部尚書而南南於錫

乎便非公乎所也楊月湖公謝尚書聖天子下廷臣議用公乎代月湖公亦難乎為代公乃宜宜乃用公乃南九峰公與某疏歸數數私獲遂公之席終南耶夫韓孫楊邵四老者天下之大老也或重公於家或重公於屬或重公於宗或重公於代其何以得此哉其何以得此哉秦出少游後代有聞人則今之聞而重也固矣夫實實而掩者蔽蔑實而揚者諛諛君子之所羞也蔽亦君子之所短也今吾於言也二者其免乎慨衷以老役贈

鮮寄於文章間積已歲月乃今弗諛弗蔽乃不敢例局  
例而不言則他日二泉公謂我何以不贈鳳山公其何  
辭以答是故序其所以家所以官內所以官外所以今  
日之南而他日之北公行哉

周貞菴奉母得告序

夏四月周貞菴念母老有故鄉之思即日疏致仕奉母  
以還以終孝而酬隱也上念之許暫輟臺務奉母而南  
給驛舟公廩為川涂之適時母以恩進太恭人以上壽

賜綿帛被有存問孫鳳鳴璽書南服得僭以從君子謂  
福壽老母人世曠見初貞菴起御史大理丞而南請母  
南比卿貳而北也無敢有請業情事乎私母止之曰新  
天子嗣服圖任更化兒不可私余亦欲北也有鳳乎在  
於是貞菴遂祿仕逮親之榮無去親樂志之托請席請  
溼請 閣 寒燠飽饑為常歲時上壽都憲拜前正郎拜

後曾孫又拜後子婦羅立官無異於家茲京而還途而  
經家而至孤杖近周經軒遠覽與官奚擇哉呂榮公德

氣醇厚歸申國太夫人之教宗曾子失恃而立以大母  
乎在周父子有然者吾家曲靖之母計部之大母壽九  
十九余嘗許序百歲壽今太恭人亦望九之年又將許  
序太恭人百歲壽也周相先業儒貞菴世獨不收有儒效  
醇質隱行往往名吳會間以久久而大固然也貞菴周  
謹雅淡入可知孝出可知忠斂而寂待清而出可以知  
時余茲入也幸得友因焉蓉溪翁謂公茲行於名教尤  
繫不可無詩詩不可無敘於某乎屬謝劣之言非以贈

君子也

壽大老邃菴楊公序

歲之冬六日少傅兼太子太傅吏部尚書武英殿大學士邃菴楊公七十壽之旦公高弟子白巖喬公蓉溪金公桂巖邊公偕諸耆舊各賦詩詩豫致祝勤以敘乎後余曰公功在朝廷望在夷夏以紀之無極所謂壽也公壽然哉公少以神童薦京師讀書翰林經子辨博胸中一秘書詞義闊深胸中一理窟而理體明習物幾迎應又

胸中一經綸道之立有如此者官外制時也經承指授四方士衆糧而至載董秦晉學政範立材成道之傳有如此者晉容臺再晉都臺為三鎮長城入為司徒為冢宰壯猷益議朝著表儀孤卿特進翊彌綸以負有文武道之行有如此者疏正國是離煩釋重居卯橋者八年溫國獨樂晉公綠野以培植士夫廉退之節道之樂又有如此者聖明在御廷臣羣薦謂公不可一日離密勿猶欲起公以載總三鎮攝六職公高尚屹不可奪上意

亦不欲煩我師臣固諒之矣溫旨存問使命有加畱有  
遺用以收有完名介有閒福壽其豈徒哉余長公二歲  
常愧屈於公不知公亦人數於余也同臭合響道義相  
規益者餘四十年擬其大支川渤海也擬其高峻嶢喬  
嶽也金焦几杖訂旬日以從青莎一棹卯橋之雲水然  
夢寐良弼公有不帖席然者因壽公附焉

海虞陳氏族譜序

羣分類聚凡物皆有族族皆有譜如植之族曰梅譜菊

譜荔枝之譜皆好事玩物之所庸心惟人之族譜其所同而系其所以異有分人而無分祖有親教孝也有賢教敬也後世有失則略略則闕有失則附附則亂有失則誣誣則鴟虜而不可覈君子均有惜焉陳按樂記有虞之後周武王所封析之閩侯官古靈村族焉傳宋樞密直學士古靈先生傳敬齋傳閭然傳一木傳北山為溫州教授宋季避地海虞之塔西為海虞人至侍御君迨凡十世世有紀君子不謂略譜所可知君子不謂附

詳所可勸君子亦不謂誣是謂信後之譜其開先足尚  
其嗣述足副其闡揚彰大陳之世殆有所不得辭者而  
古靈圖譜侍御意有待也嗚呼天綱人紀君子所以脩  
諸身睦諸族以令問長世者也角弓刺骨肉相怨光遠  
自他有耀陳敬仲之後所以得政於齊而潁川之陳慙  
卿慙長嗣述重有告焉是譜有前輩楊文貞李文忠吳  
文肅張翰譏敘跋複敘侍御之請余副焉

侍御唐六亭奏最績

成周御史職書贊受法令秦監部漢直指唐裏行宋沿  
唐增置言事著在令甲國家稽古定制內察府曹外察  
司屬又得以言為職繩回旋正挈要而提綱必歷試乎  
效始得內乎入稽其殿最又率外乎出惟宿望雄重積  
有勞勸儲之為臺長為卿少則內乎留於是人求自副  
以無負崇顯之拔湖南唐君應韶蚤受尊翁沃州之教  
居然遠器成進士試大行奉使有聲遂擢監察御史監  
稅又有聲兩按大藩兩監試事長河南道考覈惟允薛

宣之明習韋思謙之正色彭器資之敢言無愧焉總憲  
度而植風聲非其人其誰歟六載再上最諸寅察屬言  
為贈余老不受役然於君尊翁有故乃言曰君臺之長  
也臺之責其知所以難者乎知人難論人非難識事難  
論事非難而求濟為尤難蓋事之權有輕重人之迹有  
隱顯母因事而病人亦母因時而病事要於濟爾矣昔  
趙閱道為臺官君子有過則保全護惜明道為襄行神  
宗召對曰補闕拾遺則可二公知人而又全人識事而

又成事天下之士議屬焉端道軌贊中興君自有地程  
趙有成訓幸偕諸君子細求之

壽麻太夫人九十敘

某自戊戌及拜我太師李文正公之門見公順事尊府  
太師憩菴翁母麻太夫人穆如也處二弟東溟東川其  
翕如也太夫人愛公亦與東溟東川無異尤屬焉久  
乃知憩翁善父賢擇而繼以無難於公公善子孝體而  
承以無間於母也乾坤之於六子乾而健父道坤而順

母道也六子索而成男成女兄弟夫婦道也子無不愛其親父母亦無有不愛於其子兄友弟恭夫義婦順道之常也惟母有所親亦有所繼禮不殊而情異焉情異則偏偏則溺而禮乎悖斯失恃之子之益悲也善子者致不異之情以默符不殊之禮召慈固有所事本天施之同以自致一本之厚公二弟而友斯太夫人所以無因自異成兄弟之美為憩翁之慰者也公以誠結王心以厚義孚於中外母若弟孚之所也公夫人朱氏出勲

貴成國公女抑抑盡婦以無外公之刑于而太夫人之  
以慈召孝亦有所默通其間者均之謂賢爾矣竊疑舜  
僅致頑嚚於不格姦殷中宗逐一夜五起之孝已假蟬  
售譏伯奇不正其終斯曾子所以不續娶也某於李知  
憩翁嚴而正太夫人慈而順公孝而友公二弟有恭而  
化之道義制情情從禮禮召和朱夫人婦職無有異焉  
是謂和德之極太夫人薦封顯錫配上公而躋一品殆  
位遇而極及茲九十而壽不杖不扶神力健爽又福壽

而極悅之晨八月晦又前日也前是公率孫曾為壽及  
是朱夫人率符卿兆蕃暨諸孫曾中翰兆延為壽兩玉  
輝煌六翟有耀世所誠少也公門人孤卿百君子以次  
上觴有詩有敘前八十楊少傅邃翁實序及是序九十  
崔大正世興以歸之某公輸之門斷者縮手然太夫人  
福壽足書為母世訓足書憩翁與公一門之家法固在  
尤足書故序

見素續集卷七